

NO SOALAN :17

PEMBERITAHUAN PERTANYAAN

DEWAN RAKYAT, MALAYSIA

**DARIPADA : Y.B. DATUK LINDA TSEN THAU LIN
(BATU SAPI)**

PERTANYAAN : LISAN

TARIKH : 26.03.2018

Y.B. DATUK LINDA TSEN THAU LIN [BATU SAPI] minta **MENTERI KEWANGAN** menyatakan langkah-langkah untuk mengatasi masalah inflasi.

JAWAPAN

Tuan Yang di-Pertua,

1. Kadar inflasi bagi tahun 2017 adalah 3.7% berbanding tahun sebelumnya (2016: 2.1%). Perkara ini adalah terutamanya disebabkan oleh kenaikan harga minyak mentah global yang mendorong kepada peningkatan harga runcit minyak petrol. Selain itu, kesan asas atau '*base effect*' juga telah menyebabkan kadar inflasi meningkat dengan agak ketara pada tahun 2017 memandangkan kadar pada tahun 2016 adalah agak rendah.

2. Namun demikian, bagi keseluruhan tahun 2018 dan tahun berikutnya, inflasi dijangka meningkat pada kadar yang lebih sederhana. Hal ini adalah berikutan kos diperingkat global yang berkurangan selaras dengan kenaikan harga minyak mentah dunia yang lebih kecil berbanding tahun 2017 serta kedudukan matawang ringgit yang lebih kukuh dengan peningkatan sebanyak 3.8% berbanding dolar AS sehingga 15 Mac 2018. Disamping itu, kenaikan kadar *Overnight Policy Rate* (OPR) sebanyak 0.25% pada 25 Januari 2018 dalam persekitaran ekonomi negara yang semakin kukuh juga dapat membendung tekanan inflasi.

Tuan Yang di-Pertua,

3. Kerajaan sentiasa memantau dan mengambil langkah proaktif bagi mengawal kenaikan kadar inflasi yang melampau serta mengurangkan impak kos sara hidup khususnya terhadap golongan berpendapatan pertengahan dan rendah. Antara langkah yang telah dilaksanakan adalah:

- i. pemberian subsidi minyak masak;
- ii. memperkenalkan kedai harga patut (*fair price shop*) termasuk 50 buah Kedai Rakyat 1Malaysia 2.0 (KR1M 2.0);

- iii. pelancaran Agrobazaar dan MyFarm Outlet;
- iv. pemberian bantuan sekolah dan biasiswa;
- v. bantuan kepada pekebun kecil getah, nelayan dan petani;
- vi. GST pembekalan berkadar sifar dan pembekalan dikecualikan bagi barangan keperluan asas terpilih;
- vii. pemberian BR1M dengan kadar maksimum sehingga RM1,200. (bagi tahun 2018, berdasarkan kelulusan sehingga 28 Februari, seramai 6.48 juta orang dijangka menerima BR1M dengan jumlah RM5.5 billion); dan
- viii. peningkatan pendapatan boleh guna (*disposable income*) melalui penurunan kadar cukai pendapatan individu sebanyak dua mata peratusan bagi banjaran pendapatan bercukai RM20,001 hingga RM70,000. Langkah ini memberi manfaat kepada 2.3 juta pembayar cukai individu dengan peningkatan pendapatan boleh guna sebanyak RM300 hingga RM1000.

4. Di samping itu, Kerajaan melalui pelbagai agensi termasuk Kementerian Perdagangan Dalam Negeri, Koperasi dan Kepenggunaan (KPDNKK) akan sentiasa memantau harga barang dalam pasaran bagi memastikan peniaga tidak mengambil kesempatan dengan mengenakan harga yang tidak munasabah.

Tuan Yang di-Pertua,

5. Kerajaan akan terus mengambil langkah proaktif dalam menangani kenaikan inflasi yang mendadak dan memastikan kesejahteraan rakyat terjamin.